

# Tajland priznao palestinsku državu

19 Jan 2012 Izmijenjeno 19:45 CET

**Šef palestinske diplomatije rekao je da je ovo 131. zemlja koja je priznala palestinsku državu u granicama prije Šestodnevnog rata u junu 1967. Godine**



Mahmoud Abbas tokom susreta s Angelom Merkel: Njemačka može imati važnu ulogu u okviru dijaloga u regiji [EPA]

Izvori palestinskog ministarstva vanjskih poslova saopćili su AFP-u u četvrtak da je Tajland priznao palestinsku državu. Palestinske vlasti su u srijedu primile zvanično pismo Tajlanda u kojem priznaje palestinsku državu u granicama iz 1967. godine, saznaje agencija iz istog izvora. Nakon ovog pisma, predsjednik Mahmoud Abbas zahvalio je "tajlandskom kralju i vladi na zvaničnom priznavanju palestinske države", objavila je palestinska novinska agencija Wafa. "Pokrenuta je zvanična procedura u pogledu uspostavljanja diplomatskih odnosa", dodaje se. Šef palestinske diplomatije Riyad Al-Malki rekao je da je ovo 131. zemlja koja je priznala palestinsku državu u granicama prije Šestodnevnog rata u junu 1967. godine.

Mahmoud Abbas zahvalio je 'tajlandskom kralju i vladi na zvaničnom priznavanju palestinske države'.

Pesimisti u pogledu nastavka mirovnih pregovora s Izraelom, koji su prekinuti od septembra 2010. godine, Palestinci žele dobiti članstvo palestinske države u Ujedinjenim narodima (UN) kao punopravna članica. Izrael i SAD se kategorički protive ovom pristupu i tvrde da palestinska država može biti samo rezultat mirovnog sporazuma. Palestina je u 2011. godini registrirana kao punopravna članica jedne od glavnih UN-ovih agencija - Organizacije UN-a za obrazovanje, nauku i kulturu (UNESCO).

## Merkel traži napredak u pregovorima

Njemačka kancelarka Angela Merkel primila je u četvrtak u Berlinu Abbasa i izrazila želju da se postigne napredak u okviru mirovnih pregovora između Palestinaca i Izraelaca. "Važno je da se postigne napredak i da dvije strane razgovaraju jedna s drugom, što se nije dogodilo već nekoliko mjeseci", izjavila je kancelarka i pokazala optimizam, izjavivši da "vrata još nisu zatvorena" za bolje rezultate. "Njemačka je razvila prijateljstvo s Izraelom, kao i s Palestincima, pa zbog toga može imati važnu ulogu u okviru dijaloga u regiji", izjavio je Abbas. Nastavak izraelske kolonizacije na Zapadnoj obali i u istočnom Jerusalemu izazvao je zamrzavanje izraelsko-palestinskih pregovora od septembra 2010. godine. Palestinski predsjednik je u nedjelju počeo jednodnevnu turneju po Velikoj Britaniji, Njemačkoj i Rusiji, koje su članice Vijeća sigurnosti UN-a.

Izvor: Al Jazeera